



Dan zahvalnosti, 6. Mart 2022.

Saopštenje za javnost

Koordinacioni odbor “The World for Bosnia and Herzegovina” za globalno obilježavanje Dana nezavisnosti Bosne i Hercegovine 1. marta i po prvi puta i Dana zahvalnosti 6. marta 2022. godine donio je odluku o održavanju skupova podrške BiH u velikom broju gradova širom svijeta.

Povod za organizovanje martovskih skupova je jubilej 30-godišnjice proglašenja nezavisnosti tada socijalističke republike danas države Bosne i Hercegovine, kao najznačajnijeg historijskog i državotvornog čina nakon ZAVNOBiHa za sve narode u BiH.

Uprkos tome što naša domovina ove godine slavi tri decenije nezavisnosti i članstva u UN, a sljedeće osam decenija državnosti u modernoj historiji, ne prestaju vanjski i unutrašnji napadi na cjelovitost njenog državnog suvereniteta i teritorijalnog integriteta. Zato ova martovska okupljanja imaju još jedan povod, a to je ukazati na aktualnu političku i sigurnosnu krizu u BiH, sve ratobornije napade na suverenitet, cjelovitost, ustavni i pravni poredak države BiH, te ugrožavanje mira, od strane antidemokratskih, antiliberalnih, antievropskih i osvajačkih snaga i politika u zemlji i regionu, potpomognutih politikom zvanične Moskve, Budimpešte, Beograda i Zagreba.

Martovskim skupovima također želimo poručiti da prosječan čovjek u BiH ne traži i ne želi ništa više prava, sloboda, jednakosti i prosperiteta od onog standarda koje napredne demokratije Evrope i svijeta garantuju i obezbjeđuju svojim građanima. Godinama nakon presuda Evropskog suda za ljudska prava u Strasburgu u slučajevima Sejdić/Finci, Pilav, Zornić i Pudarić, u BiH nemaju svi građani jednaka politička prava glasanja i kandidiranja.

Ovim skupovima želimo također ukazati da uprkos stotinama pravosnažnih presuda Haškog ICTY tribunala, pojedini politički lideri i lojalni im mediji u Bosni i Hercegovini i regionu ne prestaju sa anticivilizacijskom praksom negiranja i relativizacije genocida u Srebrenici i ratnih zločina, vrijeđanja žrtava i preživjelih, te glorifikacije ratnih zločina. Vrijeđaju time ne samo žrtve tih zločina, nego kaljaju obraz i narodu koji navodno predstavljaju.

Martovska okupljanja predstavljaju nastavak uspješno organizovanih skupova 10. januara ove godine. Podsjećamo, skupovi podrške cjelovitosti Bosne i Hercegovine tada su održani u 35 gradova u 14 zemalja.

Obilježavanje 30. godišnjice nezavisnosti BiH 1. marta imat će svečani i politički karakter, dok je bosansko-hercegovački Dan zahvalnosti 6. marta festivalski događaj i okupljanje građana kojim Bosanci i Hercegovci širom svijeta žele izraziti zahvalnost građanima, društvima i državama koji



**THE WORLD FOR
BOSNIA AND HERZEGOVINA**
MARCH 1, 2022 – INDEPENDENCE DAY
MARCH 6, 2022 – DAY OF GRATITUDE



su otvorili svoja vrata i ponudili siguran i dostojanstven život našim građanima u vremenima kada su sile mraka pokušavale sa lica zemlje izbrisati jednu zemlju, narod i kulturu. Na Dan zahvalnosti širom svijeta Bosanci i Hercegovci će svojim komšijama i sugrađanima predstaviti najbolje iz tradicije, kulture, ekonomije i umjetnosti naše zemlje i svih njenih naroda.

Skupovi se planiraju u gradovima: Sidney, Melburn, Salzburg, Brisel, Turku, Alkmaar, Amsterdam, Den Haag, Ermelo, Tilburg, Utrecht, Rijeka, Zagreb, Dublin, Rim, Toronto, Hamilton, Otava, Frankfurt, Stuttgart, Oslo, Stockholm, Göteborg, Västerås, Boston, Portland, Derby, Viktorija, London, Birmingham, Coventry, Hertfordshire, Sarajevo, i mnogi drugi. Očekuje se i podrška i iz Nikaragve, Tanzanije, Meksika i drugih zemalja svijeta. Potpuna lista biće objavljena u sljedećem saopštenju za javnost. Na svim skupovima učestvovalaće i veliki broj građana ovih zemalja, gradonačelnika, članova parlamenta, naših kolega, prijatelja i komšija.

6. marta 2022. svi događaji u svim zemljama i gradovima će započeti u u 13,00 časova po lokalnom vremenu. Detaljnije informacije o danu, času, mjestima održavanja, organizatorima, učesnicima će biti objavljeni u kontinuitetu.

Koordinacioni odbor poziva sve građane Bosne i Hercegovine širom svijeta da uzmu učešće u ovim skupovima i još jednom pokažemo cijelom svijetu da Bosna i Hercegovina na svaki način pripada modernim evropskim i svjetskim društvima.

Koordinacioni Odbor se trenutno sastoji od građana Bosne i Hercegovine i predstavnika bosansko-hercegovačkih udruženja i zajednica iz sljedećih zemalja: Švedska, Danska, Norveška, Finska, Nizozemska, Njemačka, Austrija, Francuska, Švicarska, Hrvatska, Italija, Velika Britanija, SAD, Kanada, Australija, Bosna i Hercegovina, Belgija i Irska.

SVI ZA BOSNU, BOSNA ZA SVE!

Dosta je bilo rata, podjela, diskriminacije i krsenja zakona i ustava!

Ako i vi zelite učestvovati ili organizovati skup, pišite nam na e-mail: independencedaybosnia1.3.2022@gmail.com.